

NICOLAVS LEONICVS THO.  
mæus R. Paceo potentissimi Regis  
Britanniae à secretis pri-  
mario S.



Cio plerosque fore, Pacee præstantissime, qui hanc ope-  
ram nostram, & huiusmodi interpretandi explicandi-  
que à me suscepum labore, vt superuacuum, & mi-  
nus utilem, in tanta præsertim expositorum cum græ-  
corum tum latinorum copia, in totum reprehendant  
& damnēt. Alios vero, quos in hoc ipso fortasse æquio-  
res, noua tamen isthæc scribendi ratio, & ab ijs quæ in recenti sunt usu  
tam insolens docendī modus, non mediocriter offendat. Nonnullos  
etiam qui etsi isthuc ipsum non reprehendant, scriptionis nostræ  
stylum paulo fortasse exactiorem ac nostratum fert mos philosophos-  
rum, quasi à philosophiæ decretis alienum, & cum docentibus incom-  
modum, tum discentibus etiam ipsis subobscurum, constanter accusent  
& improbent. Quibus ego omnibus in præsentia, si, vt rei est veritas,  
occurtere vellem, me non iccirco hæc scriptitare, vt superiorum quem-  
piam authorum (quod plerique faciunt) reprehendere & emendare stu-  
deam, siue vt nostra legi cupiam, & vulgi rumusculos inde mihi aucu-  
pari contendam, sed vt me ipse doceam, otioque meo ad quod maxime  
lubet negocium nunc utar, & quod aiunt, denique vt mihi & Musis ista  
potius quam alijs canam: vere profecto nec indecenter (vt arbitror) fa-  
tis illis responsum crediderim: & non parum efficax, opinor, liberi homi-  
nis ingenuè pro se loquentis, apud æquos præsertim iudices huiusmodi  
esse videretur oratio. Verum hoc in loco aliam respondendi rationem se-  
qui statui, & diuersa aduersus illos mihi progrediendum esse via decreui:  
ne suis illi nugis nimium sibi fortasse placentes, & non nihil se solidi con-  
stantisque dixisse arbitrati, in hac erroris caligine & ipsi posthac obstina-  
te versentur, & alias etiam simplicioris fortasse ingenij inuoluere impli-  
careque studeant. Nam, per Deum immortalem, vt ad priores me con-  
uertam, quis est natura tam inuidus & inhumanus, quis excultiori ho-  
minum vitæ tam infensus & hostis reperiri potest, qui bonarum artium  
studia non in maius dari illustrarive cupiat, & huiusmodi etiam quip-  
piam aggressum inceptantemque, quantum in se est, non fauore & lau-  
dibus, non emolumenis etiam & cōmodis quibusque pro virili prose-

quatur & adiuuet? Natura enim ad pulcherrima quæq; omnes prop̄sī su-  
mus, & summo certe studio ad ea quæ bona sunt tendentibus, alacriter  
quisq; fauere debet. Quod profecto secus facere videntur ij, qui nō modo  
quacunque de re commentantibus scribentibusve non suffragantur, sed  
illos potius liuore quodam, naturæque peruersitate proculcant, insectan-  
tur, dilacerant. At inani, inquiet, labor hic absumitur opera, super-  
uacueque admodum alienis sæpius insignita rotis, eadem nunc conteri-  
tur semita. Non inficias eo profecto me in hoc interpretandi munere  
cum plerisque versari, & quorundam etiam vestigia consectari: mani-  
festa enim isthæc est res, & cuius vel mediocriter eruditio probe perspe-  
cta: neque tamen iccirco frustra hunc absumi labore, temereque huius-  
modi locari operam, optimo iure contenderim. Nihil enim, ut arbitror,  
frustra & inaniter fieri in re dicitur, quod vtiliter mehercule & apte ef-  
fici posse animaduertitur: nullaque commodæ cuiusque rei ad bonas ac-  
cessio inutilis & superuacula sane esse censetur: nisi fortasse illi gemmas  
suapte natura fulgentes, noua sæpius arte circunductum replicatumque  
dedecere putant aurum, purpuræque in dibapho repetitum colorem qua-  
si superuacuum aspernentur & damnent. Nam de labore nostro, dum-  
modo is sit qui probetur à paucis, nihil sane est quod nimium labore illi,  
aut alienæ modum industriæ statuere querant. Eiusmodi enim in re  
operam exercemus nostram, in qua & suavis certe, quicunque is est, vi-  
detur esse labor: & nullus omnino debilitatis aut lassitudinis subest ti-  
mor: & ea nimirum aggredimur in hoc opere, & perficere contendimus,  
in quibus ab omni antiquitate locupletissimis iuuari possimus exemplis.  
Nulli enim ferè apud antiquos paulo operosiores fuere commentarij, qui  
non multos diuersarum etiam extatū repererint interpres: nulliusque  
locum præoccupantis hac in re solitaria vnquam certaque fuit possessio.  
Namq; ut ad antiquiores nostra se conuertat oratio, nō Alexandri Aphro-  
disei in Aristotelem editi commentarij, cuius vel antiquissima literis  
mandata Peripatetici dogmatis fertur institutio, Themistium, aut Por-  
phyrium, aut Syrianum, quo minus idem factitarēt, vnquam deterruerūt,  
neque ij postea Philoponū, Ammonium, Simpliciū, Psellū, aliosque mul-  
tos, quorū sane fama obscurior, par certe est labor, ab interpretādi propo-  
sito auertere potuerunt. Quos vestigijs cōsequuti Arabes, Latinorūmq;  
omnis postea chorus, magna cum laude in hoc versati stadio, de optimarū  
artium studijs, eorumque affectatoribus egregie sane meruisse videntur.

Sed quid ego nunc riuulos consector, cum fontes aperire largissimos pos-  
sim? Nonne ijsdem de rebus tanquam dictatis Aristoteles, Theophra-  
stus, Strato, Dicæarchus, Demetrius Phaleræus, & vniuersa denique Pe-  
ripateticorum natio eodem ferè modo & ordine conscripserunt: De Lo-  
gicis inquam, de Physicis, de Ethicis, de Diuinis. Nonne quæ diuus ille  
Plato, & Speusippus literis mandauere, Xenocrates postea & Polemo &  
Crantor, vniuersaque veluti in gyrum Academia retractare non destitit?  
Idemq; alijs etiam in sc̄ptis omnes ferè factitauere philosophi. Quorum  
tamen omnium commentarij & in magna sane apud veteres sunt habiti  
existimatione, & ab eruditioribus magnopere semper & sedulo sunt le-  
ctitati. Atque utinam id ipsum nobis nostris que facere licuisset, & non  
iniquo quodam fato tot præclara ingeniorum monumenta interiissent:  
melius profecto cum bonis studijs reque literaria actum fuisset, & excul-  
tior mehercule multo eruditiorque nostra nunc esset ætas. Verum ita for-  
tasse tulit necessitas, cui plane aduersari (vt inquit Plato) neque Dijs qui-  
dem ipsi possunt. Cum igitur antehac nullus (vt ad propositum reuerta-  
mur) antiquorum editionibus scriptisve authorum à scribendi sit vñquā  
studio reuocatus & deterritus, sed admonitus potius & animatus: quæ-  
nam, malum, est inuidia, si nos etiam cum multis in hanc exponendi sce-  
nam fidēter sane & alacriter ingressi sumus, & sedulam quam possumus  
operam literarum studiosis præstare contendimus: Non enim in hoc (vt  
arbitror) iure reprehendi meremur, quod & libere permisum est omni-  
bus, & multorum insuper magnorumque exemplo recte facere videmur.  
Nisi fortasse quipiam secus ac par est, hac in re nunc facimus: & quam  
induimus personam, nō apte decenterque agere censemur. Quamobrem  
illud non ab re profecto me moueret magis, si nostra hæc scribendi com-  
mentandique ratio, aliquam iustę reprehensionis ansam merito præberet  
ijs qui recentioribus assueti commentarijs, & illorum diuisionibus subdi-  
uisionibusque condocefacti, eundem fortasse scribendi modum à nobis  
expostulant & requirunt. Quos ego omnes, vt æqui boniq; cōsularūt, ro-  
gatos velim, si hac in re antiquos potius cum Græcos tū Latinos & Ara-  
bas, quam nouitios quosdam, pridie (vt aiunt) & nudius tertius philoso-  
phari aggressos, mihi esse imitādos proposuerim: qui optimo mehercu-  
le instituto, quodcumque caput eius quem exponunt authoris, siue cuius-  
uis particulam capitum, primum antedictis annexunt & veluti congluti-  
nant sententijs, vt vñus & continens in omnibus apte rerum appareat  
ordo. ita vniuersum illius strictim colligunt sensum: postea particulatum

explicant, & ad sequentia rem omnem decenter accommodant. Quem profecto interpretandi modum & ipsi laudabunt, certo scio, si expurgatis (quod aiunt) auribus veras audire rationes non neglexerint, & iudicio magis quam opinione totam hanc rem pensiculare voluerint. Illorum postrema restat obiectio, quos stylus hic noster paulo fortassis exactior, & à consueto nunc scholarum vsu alienior offendere videtur. Quāquam si ita esset, quod haudquaquam recipio, neque in me esse cognosco, male credo mererer de literarum studijs, studiosisque omnibus, quos hoc exemplo ad ea quae recta sunt consecunda peragendaque iuuarem. Verum is sane scriptio nostræ est stylus, ut etiam cuius vel mediocriter eruditio palam esse possit, qui nihil in se quæsitum, nihil elaboratum sane habere videatur, & qui plane omnia usitatis rerum vocabulis pro virili explicare contendat. Non enim verba in ijs, sed res ipsas consecandas & inueniendas esse duximus, quas certe si alia rationis via monstrare possemus, libenter mehercule ijs verborum ambagibus circunductionibus que careremus: sed aliter id fieri non potest. Veruntamen ijs ego facile concedo, & veniam etiam do, si istiusmodi rebus quibus non assueverunt à pueris, non admodum delectantur: & ea quæ fortasse assequi se posse diffidunt, contemnunt & damnant. Mecum autem satis commode actum iri existimabo, si quid dignum gratumve eruditis auribus, & antiquitatis obseruatoribus, ijs meis lucubrationibus excudere potero, tibique præcipue Pace eruditissime, qui à primis annis optimarum artium studio flagrans, neque rei familiaris remoratus es cura, quæ plerique domi continere solet: neque laboris periculorumve incommodis, quæ peregrinantibus plerunque accidere consueuerunt, es deterritus quo minus ex ultima Occidentis insula Patauium te cōferres, ea forte tempestate, qua isthæc ipsa quæ tibi nūc dicamus, eo in gymnasio publice profitebamur: ubi studio & diligentia breui adeo in literis profecisti, & ad id sane disciplinarum culmen ascendisti, vt pares tibi nunc paucos, superiorem certe habeas neminem. Verum hæc in præsentia, quæ iustum mehercule laudum tuarum volumen exquirerent, missa faciamus, & ad propositum negotium reuertamur. Eos philosophi Aristotelis commentarios mihi nunc conuertendos explicandoque præcipue assumpsi, quos Parua Naturalia vulgo appellant, quoniam inter alios iij & mendose satis depravateque leguntur, & illo de Sensu & Sensili excepto, quem D. Thomas Aphrodiseum sequutus exposuit, alij certe omnes exactius illustrisque quoddam explicationis lumen proculdubio desiderare videntur.

Doctrinæ autem modus is à me pro virili seruabitur, qui cum breuitate,  
clarissimus, & Aristotelicæ mentis significantissimus à me reperiri pos-  
terit, diuisionibus quæstionibusve superuacuis aut neglectis omnino, aut  
omissis, nisi quæ prò rerum intellectu facere videbuntur. Verū prius  
quām propositum aggrediamur negotium, & ad conuertendi ex-  
plicādique seriē deuoluamur, præmissa prius breuiter vniuer-  
salis philosophiæ distributione, nonnulla quæ ad naturalem  
illius maxime spectant partem, fortasse non erit malum  
percurrere: quæ alioquin cū in multis sint necessaria,  
'cognitu etiam (vt arbitror) non erunt iniucunda.  
Post quæ ad illa recēsenda diueniemus quæ ad  
eos quos interpretari volumus commenta-  
rios pertinere videbuntur. Quæ quo-  
niam expositores fere omnes in  
omnibus præmittere præfari  
que cōsueuere, præfatio-  
nes non immerito  
& proēmia sunt  
appellata.

Vale.